

景明刻本鹽邑志林

通史它石序

俊卿自弁齒趨庭好耽古史上自五帝下迨金元
或統緒未當駁正之增纂之或事業殊科心迹未
亮追貶之申理之雖一言行之微關於人品治道
之大者必加標綜非好奇也海角蒙求聊與賢達
訂評以祈折衷耳漫號通史它石取錯玉之義願
爲列史氏忠臣云

萬曆十有七年己丑春二月望日海鹽八十八翁
仇俊卿譔

仇舜徵通史宅石卷上

鹽邑志林第四十二帙

黃岡樊維城彙編

後學胡夏客

鄭宸敷訂閱

曾孫仇祚熙重輯

古史秘錄有帝系譜及皇圖要覽諸帙自開闢至
獲麟二百七十六萬歲分爲十紀大率一紀二十
七萬六千年十紀者九頭紀五龍紀攝提紀合洛
紀連通紀序命紀循蜚紀困提紀禪通紀流汜紀
此皆劉恕羅泌所及言也鄭玄方回輩洵尚之此
十紀在盤古之前雖天皇氏地皇氏人皇氏不之

及若大庭栗陸尊盧赫胥混沌葛天不越博采異
傳魏了翁疑焉三皇淳龐似難追覈五帝而下著
代當明於是取易繇月令補少昊本紀
少昊青陽氏黃帝第五子名摯方嫫氏所生母感
大星流于華渚而娠大戴禮云黃帝之子少昊生
于稚華之野其渚一旦爲陵鬱鬱葱葱焉內典謂
真人降生輪闢轉動降居江水邑于窮桑卽曲阜
因所都號窮桑氏胙土于青曰青陽氏繼黃帝五
行之氣以金德王天下曰金天氏能修太昊之法
曰少昊氏卽位之元年鳳鳥適至因以鳥紀官詳

郊子其御世也諸福之物畢至立建鼓制浮磬以
通山川之氣作大淵之樂以諧人神和上下是曰
九淵蓋與咸池雲門繼響也孔安國尚書序皇甫
謐帝王世本並以少皞居五帝之列春秋臯鼬之
會叔魚介萇弘曰昔武王克殷選建明德以藩屏
王室命魯公伯禽以法則周公而封于少皞之墟
其地卽曲阜周禮兆五帝于四郊故月令明堂位
緣之在秋令白帝之候則曰其帝少皞其神蓐收
少皞諸子亦列五行之官蔡墨對魏獻子曰五行
之官是謂五官實受氏姓封爲上公祀爲貴神水

正曰句芒火正曰祝融金正曰蓐收水正曰玄冥
土正曰后土獻子曰社稷五祀誰氏之正官也對
曰少皞氏有四子曰重曰修曰該曰熙實能金木
及水使重爲句芒該爲蓐收修及熙爲玄冥世不
失職遂濟窮桑此其三祀也顓頊氏有子曰黎爲
祝融共工氏有子曰句龍爲后土此其二祀也后
土爲社稷田正也列山氏之子曰柱爲稷周棄亦
爲稷自商以來祀之故禮記月令祭義少皞父子
相沿不廢少皞之臣亦有可舉者昔齊景公田獵
而歸晏子侍于遄臺飲酒樂公曰古而無死其樂

若何晏子曰古而無死古之樂也君何得焉昔爽鳩氏爲少皞之司寇治居于此古者無死爽鳩氏之樂非君所願也已而晉平公有疾夢實沈臺駘爲祟叔向不知問于子產對曰昔金天氏有裔子

二云能世守其官帝顓頊嘉之封於汾川由是觀

之此汾神也少皞君臣子姓歷繫在籍太史公不爲少昊作紀班氏漢書荀悅漢紀均爲疎也且不追前古卽以秦漢語之周幽王爲犬戎所敗秦襄公攻戎救周始列爲諸侯居西垂自以爲少皞之神作西時祀白帝其後十六年秦文公東獵汧渭

之間卜居之而吉作鄜時後十七年秦德公立卜
居雍世祀少皞其牲用騂駒牛羊各一色尚白詩
曰振鷺于飛于彼西雍蓋以雍爲西方取鷺之潔
白者以況王賓而金天氏之流風遠矣不特是耳
漢時園丘祀明堂配享有五天帝五人帝之說
曰靈威仰赤熛怒含樞紐白招拒叶光紀五天帝
也曰伏羲神農黃帝少昊顓頊五人帝也更以讖
緯加北極爲耀靈魄名六天而五人帝之配享者
不改于初曹植贊少皞曰青陽之裔陳澔注禮記
曰金天之神秦漢封禪金符玉冊照耀當世史官

顧佚之耶意者焚書之厄古典散亡靡由綜述俟
于人文昭代以續之耳

聖王開天順時作曆垂統以詔治道邇諸三代之
王迭建曆法然弗諳建寅得氣序之正者五帝相
傳之秘典也尚書贊舜攝位曰正月上日受終于
文祖比卽位又曰月正元日舜格于文祖迨舜禪
禹虞史仍著正月朔旦受命于神宗夫上日元日
朔旦並言正月初一也文祖神宗之廟不求其同
舜禹造廟各陳禪讓卽位之事其日必于正月之
朔斗柄建寅以此月三陽之升泰道也三代迭興

曆統雖殊未嘗改月商革夏正嘗建丑矣故伊訓
曰惟元祀十有二月乙丑伊尹祠于先王祇見厥
祖羣后總已聽於冢宰太甲中篇惟三祀十有二
月朔伊尹以冕服奉嗣王歸于亳按商曰祀元祀
者太甲卽位之元年三祀者太甲終喪之三年俱
稱十有二月商不改于夏之正月也雖周亦然函
風之詩曰四月維夏六月徂暑九月築場圃十月
納禾稼周禮太宰正月之吉始和布治于邦國都
鄙儀禮春見曰朝夏見曰宗秋見曰覲冬見曰遇
四時次序如故周雖建子亦未嘗改月也惟春秋

諸傳間出異說魯隱公元年春正月杜預注隱公之始年周建子之十一月初一日也用周正朔者若謂東遷之後王室雖卑而政令猶行於天下也桓公卽位書春王正月胡康侯謂以天道王法正桓弑君兄之罪斯得筆削之心法也公穀顧云周時之正月夏之冬月也如月令旣改時皆反易百工何以撫辰趨事乎且經傳中自相牴牾者不服屢數姑舉一端議之桓公五年經書秋大雩左傳云書不時也凡祀啟蟄而郊龍見而雩始殺而嘗閉蟄而蒸夫啟蟄者夏正建寅之月祀天南郊取

陽氣之方升也龍見者建巳之月蒼龍宿之體昏
見東方萬物始盛待雨而大故雩以祭天爲百穀
祈膏雨始殺而嘗者建酉之月陰氣凜殺百穀始
熟故薦嘗于宗廟閉蟄而蒸者建亥之月昆蟲閉
戶萬物皆可成薦者衆故蒸祭宗廟是皆順時致
祀先時則書徼且妄也後時則書慢與瀆也卽據
此傳可復謂春秋用周正耶或者謂孔子因麟經
書之記其非也似爲近之想當時列國有三正迭
用莫之適從者故孔子荅顏淵爲邦之問啟以行
夏之時示曆元也以此詔世秦猶不經建亥爲正

以十月爲歲首不諗于天地人之統何所取也秦雖改建亦不改月史記始皇三十一年十二月改臘月爲嘉平由是知秦人雖謬戾亦未嘗以季冬爲春正月也漢高草昧而興因仍秦敝未及追尋先王禮典七年長樂宮成叔孫通禮儀初定乃書十月諸侯朝于長樂宮乃事適偶然非預定爲朝期也至武帝嚮用文儒始改年太初行太初曆仍從夏正盡革昔人之謬可以建諸唐虞而合其心法叅諸律呂而探其曆元迄今遵行萬世無弊不必葺莢生階而先王之迎日推策以前民用者昭

如也

神禹玄圭告成制九州之貢徐州曰厥土五色孔安國以爲建大社錫土封之用觀啟之誓師于甘有曰用命賞于祖不用命戮于社夏立社矣湯祀在亳都曰亳社武王革商號勝國之社則屋之不使受天地風露之氣以示戒周禮地官大司徒設其社稷之壇而樹之以其野之所宜木郊特牲引尚書無逸篇曰西社惟松東社惟柏南社惟栗北社惟槐今尚書無逸無此文其張霸之僞尚書乎亦未見天子東西南北之四社魯論夏后氏以松

殷人以柏周人以栗宰我謂使民戰栗孔子深責之三代各以其土之所宜木植于社不以木取義而宰我附會戮人于社之說以爲使民戰栗故時君殺伐之心謬之甚也大司馬仲春教振旅祭社若師有功則左執律右秉鉞以先愷樂獻于社大司寇大軍旅蒞戮於社凡國之大事天子倚重于社稷者如此宰我蓋誤于行師獻凱之說而妄爲此對也前有櫟社後有枌榆社莫非土宜之法祭法曰諸侯爲百姓立社曰國社諸侯自爲立社曰侯社此見諸侯有二社其一爲受封之社其一

爲民祈報之社也祭法又曰大夫以下成羣立社
大夫以下謂至庶民也大夫不得特立社與民族
居百家以上共立一社鄭玄所釋是也白虎通曰
天子社廣五丈諸侯半之其色東方青南方赤西
方白北方黑以之割封王國苴以白茅冒以黃土
白茅取其潔黃者取其王封者以服四方也漢武
分封三王策命有取于此左傳書社千家齊侯致
千社于魯齊人與衛地書社五百杜預所謂二十
五家爲一社積筭所及也

王制曰天子社稷皆太牢諸侯社稷皆少牢此社

稷用牲之異昔洛邑旣成社于新邑用牛一羊一豕一意者天子之社地合天下之后土以祭故用太牢諸侯之社祭不越望乃一方之后土故禮用少牢大宗伯以血祭祭社稷郊特牲云社祭而主陰氣又曰社所以神地之道王制曰祭社稷爲越紼而行事凡祭社必及稷社稷土穀之神有功德者配食焉共工氏之子曰句龍食于社有厲山氏之子曰柱食于稷湯革夏命置社稷謂句龍有平水土之功仍配享于社后稷有播種之功乃遷柱而以后稷配于稷詩之載芟春祈穀也良耜秋報